

Menor a haya yiu mientrastanto sin sa ken ta e tata

Dos homber condena pa relacion cu menor di edad

DIABIERNA Corte a trata e caso penal contra e hombernan Nelson W (28) y Dyron S. (29), kendenan a tene relacion sexual cu un mucha muhe menor di 16 año, manera ley ta prescribi. Corte a haya nan culpabel di e delito, a pesar cu nan a bisa cu esaki tabata con consentimiento di e menor. Esaki ta un caso mas di embarazo hubenil y problema social.

E dos hombernan aki no a splica con nan a conoce e menor di edad, pero a admiti di a mantene relacion sexual cu e menor, entre januari y maart, 2018. Loke ta nifica cu e yiu por ta di cualkier di nan dos. No a wordo menciona si e tabatin relacion cu otro hende mas den e periodo ey. Hecho ta cu ora cu el a sali na estado, e denuncia a wordo haci.

Nelson W., kende ta casa y tin tres yiu di e matrimonio, a pidi su disculpa y admiti cu el a haci malo. “Si e yiu ta dimi, mi lo asumi mi responsabilidad,” el a bisa Hues. Segun e declaracion cu el a duna e tabatin relacion 3 pa 4 biaha cu e mucha muhe den auto. Y e mucha muhe mes a bis’e cu e tabatin 18 año. E no a sospecha ningun momento cu el a gañ’e.

Dyron di su banda a bisa cu e tabata bay buske na su scol y mirando su forma di ta, e no a sospecha cu e mucha muhe a gañ’e riba su edad.

Na dos ocasion so e tabatin relacion cu e mucha muhe y asina cu el a haya sa cu e no tin 16 año, el a dicidi di stop di top cun’e mesora. E acusado aki no ta casa, pero tin tres yiu.

Ley ta papia di excepcion, ora cu entre esun cu a mantene e relacion cu e mucha muhe ta di mesun edad y cu tin un relacion amoroso di algun tempo.

Fiscal den su rekisitorio a splica cu e provision poni den ley cu ta prohibi pa adultonan tene relacion cu muchanan menor di 16 año ta pa proteccion di e menornan. Cu e edad ey ainda nan no ta completamente desaroya mentalmente pa dicidi riba nan mes. Y e no ta bon pa nan desaroya normal tampoco.

Fiscal a tene cuenta cu e dosnan aki nunca antes a haya nan mes involvi cu husticia pa tipo di casonan asina y a tene cuenta cu loke normalmente Hof ta impone pa casonan asina, cu ta 18 luna, di cual 6 ta condicional y 3 año di prueba. Esaki pa nan pensa nan mes bon prome cu comete algo asina atrobe.

Abogado mr. Lejuez a splica cu su cliente a admiti y mirando e circunstancianan ey, y teniendo cuenta cu e mucha muhe mes a bisa cu e ta sexualmente activo for di su 9 año, a pidi pa mas bien duna un castigo di 12 luna, combina.

Mr. Paesch, kende a representa Dyron, di su banda a splica cu su cliente ningun momento por a sospecha cu e mucha ta menor di 16 año, basando su mes riba e edad cu el a bis’e cu e tin y e hecho cu e ta bay buske na un scol unda muchanan te cu 22 año ta asisti. Y su Facebook account tambe ta bisa un edad cu no ta 15.

Hues a bay studia e caso un rato y a bolbe bisando cu e ta dicta sentencia mesora. E ta haya cu e delitonan aki a keda proba pa-sobra nan a admiti y contra esey no por haci nada otro y no tin ningun hustificacion. E ta tene cuenta cu e circunstancianan y den cuadro di esey e demanda di Fiscal no ta straño pa casonan asina. Pues 18 luna di cual 6 luna ta condicional.

Esaki ta nifica cu nan mester sinta 12 luna y di e cantidad aki, un tercera parti ta wordo kita pa bon comportacion. Pues nan lo mester sinta 8 luna. Esaki ta nifica cu nan lo mester sinta 1 pa 2 luna mas. Esaki probablemente a pone cu ambos acusado a acepta e castigo y lo no apela e decision.

Hues a conseha ambos pa laga haci un test di paternidad pa mira si nan ta bay tuma nan responsabilidad den e caso aki.

